

s'estant saisi de quelques rues de la ville, entrant partout, et dissipant ce qu'il pouvoit rencontrer, iettant beaucoup de maisons par terre; ou mesmes (choses fort pitoyable) plusieurs hommes, femmes et petits enfans furent surpris et accablez, et vn infinité de meubles et autres bien perdus et gastez : outre ce le pont basti sur le dit Fleuve fort toutesfois et puissant, fut tellement esbranlé de la violence, que quelques arches tombèrent, et vn infinité d'arbres sous et à l'entour dudit pont. Or il n'y a gueres lieu, ou plus evidentes marques et plus piteuses apparoissent de ce desbordement et de sa violence terrible, qu'en la Guillotière, bourg fort beau auprès dudit pont. Car, outre vne infinité de marchandises, cheuaux et bestail perdu, la ruine presque de toutes les maisons feroit bien telle pitié, que ie ne sache cœur si dur qui ne s'amolit au seul aspect de tel degats. Si trouue ie fort merueilleux, qu'il n'est demouré maison aucune qui ne soit ou peu ou prou offensee, et qu'an puisse dire exempte de mal. Iugez donc maintenant qu'elle peu estre l'impétuosité et le dommage qu'il aura fait vers Vienne, Valence, Sainct-Esprit, Auignon, et autres rais par où il passe, desquels tous les iours nous oyons piteuses nouvelles. D'autre costé il s'estendit tellement par le plat païs, qu'à vne demie lieuë de largeur et dauantage, il n'y eust village, bel édifice, ny metairie qui n'obeist et succombast à sa violence, et qui peust aucunement subsister iusques mesmes à trainer quant à soy une grange pleine de foin, avec les bœufs attachez au ratelier : chose non iamais ouye. Vn grand volume ne suffirait à descrire les miseres et calamitez qu'il a causé. Doncques si la Saone (fleuve duquel ie t'ay parlé) quittant ses bornes, eust changé sa douceur et lénitude en pareille impetuosité et desbordement, qui n'eut iugé tout deuoir abysmer et fondre? qui n'eust estimé ceste partie basse estre en extreme danger de perir? Bref qui n'eust en opinion que les Dieux vouloyent abysmer ceste ville par eau, comme du temps de Néron par feu quand elle estoit bastie sur la monstagne? comme la voulant